

Von de Kerb unn de Kerweborsch

Also erstemol: Ess heeßt zwar „die Kerb“, awwer die junge Leit, die doo mett Kapp un Schärp erumlaafe unn rufe: Wem iss die Kerb?, dess sinn „die Kerweborsch“. Koon oone Flerschemer sacht Kerbeborsch, nor geschriwwe werds in de letzte John so. Dess muss geännert werrn, aach im Flerschemer Blättche.

Awwer jetzt: Om Noochkerwemondaachowend war om Moo was los! Dess scheene milde Wetter, dess Kerb-Begrawe, dess Feierwerk, die Fahrgeschäfte unn die Kerweständ hawwe nochemol en Haufe Leit aus ihrne Heiser gelockt. Wos Glihwoi gewwe hott, hawwese in Sechserreih gestonne, doo mussde dich erstemol zu de Thek durchkämpfe, um oon ze kriegh. Kerweborsch unn scheene Kerwemädcher, Kinner, Junge, Alde, Flerschemer unn Fremde warn so richdich luschdich beisomme, so was iss e schee Kerb, so missts immer soi.

Awwer weider: Ich will emol iwwer den Monn krätsche, der om Kerwemondaach die Bopp vom Kerweboom gehollte hott, om helle Noochmiddaach, vor alle Leit. Iwwer so was kann nor der lache, der doo enuff geklettert iss – unn soi Fraa, weiler gesund wider erunner kumme iss. Wenn der enuff geklettert wär, die Bopp emol oogefasst hätt unn wider erunner wär, den Klau von de Bopp also grad nor oogedeut hätt, als wie: Sehder, ich hättse klau kenne!, iwwer so vill Kletterkunst und Fairness hätte sogar die Kerweborsch geklatscht. Awwer wer macht dann heit noch Oodeudunge, es muss immer alles vollzooche werrn. Unn immer muss noch ooner druffgesetzt werrn, jed Jahr, nooch dem olympische Prinzip: Schneller! Höher! Weiter! Diesjahr sinns 950 Liter Äppelwoi, nächstjahr misses 1000 soi. Es wär on de Zeit, emol e bisje was zurickzefahrn, weil dess Verkaafe von de Kerb iss joo e symbolisch Hondlung, doo det en Bembel Äppelwoi, von de Kerweborsch unn de Vize sesomme gedrunke, aach emol longe. Awwer wer macht dann heit noch Oodeudunge ...

Aach die 20 Kerle nit, die uff die Kerb kumme sinn unn unser Kerweborsch ooge-griffe unn gehaache hawwe. Doo hosde Wut, bist awwer sprachlos, weil sowas kann joo kooner vorherseh, aach die Polizei nit. Die Ooführer von dene – dess warn bestimmt nit mehr als drei, die onnern siebzeh hawwe aus Kameradschaft mettgemacht, merr kennt dess joo - soll merr sich emol schnappe unn dene ins Gewisse redde. Wo komme merr dann hie, wenn merr bei jeder Donzmusik enn Sicherheitsdienst brauche, der dann die Leit aach noch abtaste muss? Unn die Marokkaner oder Türke feiern doch aach emol e Fest, soll dann bei dene aach die Wach stehe?

Unn drum kimmt jetzt dess Letzte: Mache merr Partnerschafte mett de Ausländer unn fonge oo mett de Türke in de Waldstrooß in Risselsem. Dess iss nit so weit wie Güzelsatsche, unn doodebei det merr erfahrn, wie Türke hier bei uns lewe. Dess wär intressonder als nooch drei Fluchstunde Volksdänz vorgemacht ze kriegh, die in de Türkei heit grad so exodisch sinn wie Schuhplattler in Bayern. Unn gäbs emol Krach zwische Deutsche unn Türke, könnte sich e paar Ältere mett de weiß Fohn mitte uff de Opelbrick trefe unn verhonnele: Dann det gonz sicher koon oone Schlaach mehr ausgedaalt werrn. Awwer dess werd nix, glaab ich, weeche dem olympische Prinzip ...

Eiern Honnes